

(C.) In nomine domini nostri Iesu Christi Dei eterni. Hludouuicus gratia Dei imperator augustus. Decentissimum atque sacratissimum fore arbitramur uenerabilium monachis locorum augustalis opem tribuere dignitatis et subsidium attribuere quietis, quatenus incursionum remotis illecebris pio Domino, regulari dediti disciplinae, famulari iugiter delectet et pro nobis proque dilectissima coniuge fidissimisque optimatibus nostris ipsius clementiam exorare ne pigeat. Itaque omnium fidelium sanctae Dei aecclesie nostrorum scilicet ac futurorum nouerit uniuersitas, quia Hermenricus Ebo-biensiis coenobii uenerabilis abba per Angilbergam dilectissimam coniugem nostram clementiae nostrę detulit obtutibus praeceptum diuę memorię domni et genitoris nostri Hlotharii perpetui augusti, per quod monachis eiusdem monasterii quasdam uillas una cum monasterio ubi degebant concesserat quiete habendas et ordinandas. Obtulit etiam nostrę serenitatis pragmaticum, quo simili modo ea, quę idem dominus et genitor noster pręfatis Dei seruis largitus fuerat, nos quoque concessimus et firmauimus. Sed quia minus quedam^a in eisdem praeceptionibus habebantur, quae fratribus praescripti sancti coenobii competere noscuntur, ad petitionem eorundem seruorum Dei deprecata est excellentiam nostram, ut praeceptum ipsum renouare et ea, quę congruere et necessitatibus famulorum Dei expedire petebat, alia pręceptione concederemus et firmaremus. Cuius pręcibus ob amorem Dei sanctorumque suorum reuerentiam et mercedis nostrę emolumentum libenter assensum prębuimus et hanc nostrae auctoritatis constitutionem perenniter et inmotabiliter conseruandam fieri iussimus, per quam eis omnia, quę inferius annotantur, inrefragabiliter absque cuiusquam inquietudine et diminutione seu inmotatione concedimus habenda et ordinanda per abbatem, qui pro tempore fuerit, nostra largitione et eorum electione ipsi sancto loco substitutum secundum Dei uoluntatem eorumque in omnibus competentem utilitatem. Id est monasterium cum cellulis infra uallem, in qua situm est, consistentibus, Turrem, Salonianum, Montana et Maritima cum cellulis, Carice, Turio, Carelio, Comorga et Castellione, Ranci cum Casasco et Caniano atque Brioni ac Uicopontio, Uirdi cum ecclesia sancti Pauli in Niza et sancti Albani in Candubrio, Montem Longum cum Memoriola, Bocco et omnibus appenditiis suis, Touatiam cum ecclesia sancti Pauli in Sartoriano, Prato Siluando cum ecclesia

^a) über der Zeile nachgetragen.